

四庫全書

集部

欽定四庫全書

集部

紫山大全集卷二十三

詳校官庶吉士_臣朱理

侍讀_臣孫球覆勘

謄錄貢生_臣張大同

欽定四庫全書

紫山大全集卷二十三

元 胡祇通 撰

雜著

縣政要式

置軍民站匠諸色戶計各鄉保村莊丁口產業鼠尾簿
一扇各戶留空紙一面于後凡丁口死亡或成丁或產
業孳畜增添消乏社長隨即報官于各戶下令掌簿吏
人即便標注凡遇差發絲銀稅糧夫役車牛造作起發

當軍檢點簿籍照各家即日增損氣力分數科攤不偏
枯不重併使姦吏不能欺謾至于土田婚姻驅良頭匹
債負一切詞訟一一憑籍照勘此籍如一縣之大圓明
鏡物來即應妍醜莫逃續有分房析居復業還俗于驅
為良等戶亦依上標附又置交參分外來寄居別投下
諸雜戶計簿一扇以備互相爭訟二簿一一從實無得
漏落包套隣佑主首社長互相保結不實者罪之各村
荒閒官地及牧馬營盤亦仰于各村下標注此籍既定

別寫一扇申州申府頓放互相照勘事君敬其事而後其食此人臣之常分也主爾忘身公爾忘私國爾忘家志在于立功樹名富貴不萌于心此人臣之常職也即今觀之上自執政下及州縣以培克聚斂為通才以苞苴邀結為得計不究己之才不才甫霑一命即望台司金玉滿堂愈懷貪冒出憂國之一言衆指以為妖訛舉愛民之一事咸疾以為狂妄虛文具于督責實效墮于杳茫敗事者無罪成算者無功廉公謹救者反謂之好

名賊污賊蠹者反謂之才幹驅僧曳青紫倡優佩章印
奪攘矯虔布滿中外長舌利口變是為非婢膝奴顏進
階增秩甚至鬻女而貨妻奚啻吮癰而舐痔言語煦煦
相取下而戈戟伏于中心同仕數年再相遇則白眼若
不相識小人同惡相濟結為朋黨此千古之常情也今
則不然相誓指天曰非誠也刺血為盟言非誠也握手
出肺肝非誠也出妻見子非誠也升堂拜父母非誠也
通才納賄非誠也面譽而背非朝諾而夕畔雖蛇蝎虎

狼不食其類乃甘心而忍為雖鬼蜮優倡不欺其徒乃面謾而無恥詭譎不測變詐無窮人心之惡一至于此內外同風不以為怪不惟僚屬友朋之若是子焉而許其父弟焉而訴其兄妻妾訟夫主奴隸誣長上天道人倫悖逆斷喪瀰漫壞爛一至于此于所厚者薄有此理歟有識者坐視而不可救固當緘口結舌亦安得不為之寒心哉聖人知民生之有欲不可不為之防故因其性之固有使仁且壽禮樂教化之功也聖人身行正人

倫亦正恐遠方遐域不能見聞立五服公侯伯子男設庠序學校以訓誨教養之薰陶以詩書禮樂以成德焉教而不從董之以威刑政是也刑者救惡于已然兵亦刑也誅其長惡不悛者也後世救時宰相謀不及此事至而不為之備患生而不為之防不能積九年之蓄而為救荒開廩勸糶之法不能使比屋可封故嚴立不孝不悌不睦之刑不能使風俗朴素樂于務本故有抑游惰重商稅賤倡優雜類之政不能定立田制一夫百畝

故有限公私田之制不能使民不為非故有警夜巡捕之禁不能使死徙無出鄉重祖先邱隴故有招誘捕捉殃及親戚隣里之刑陵夷至于近世苟且弊政又不能行事至物來專以刻薄督責為言逼迫威虐為務示已之才陷人於罪歸功於己嫁禍于人欺天罔上具文無實交結權貴增秩遷官諂媚士夫沽名釣譽民困瘁而不恤憂私財之不足致紊亂而反喜得縱恣而為姦加之常憲寬弛惡不必罰善不必褒以不公之毀譽定人

才之黜陟以風聞之是非為功過之實迹苟且滅裂貪
汚日甚一日具曰予聖孰知烏之雌雄正謂今日移牒
本司通行所屬照條畫節文百姓不得越訴諸衙門各
有分限不得受越訴推原立法本意司縣者親民之官
日與小民相親情偽易見不能欺蔽責任不可不專不
專則怠惰推遞紛亂繁冗久不能決故罪有五十七十
以下司縣決之小民所爭訟不過婚姻債負良賤土田
房舍牛畜鬪毆而已所犯若無重罪司縣皆當取決不

合申州申府申總府申提刑司即今司縣官吏貪邪每
遇上項本職合斷事理于元告人被論人處兩下受訖
賄賂或瞻徇囑託或畏避形勢欲從正歸結則恐倒錢
告訐欲從邪處斷則恐提刑司照刷兼負寃者不肯准
服所以申州申府一解釋怨謗二洗雪已過嫁是非于
州府為州府得此復效司縣所為嫁是非于總府總府
復效州縣貪求厭足調發于州縣以致或爭地一畝價
錢不直數貫上下前後官吏行求費鈔數百貫逗遛七

年十年不能杜絕中間兩家隨衙諸干連人隨衙妨廢農功生業不可計數隨衙之間呼喚不著小吏獄卒百端凌辱小心畏法者以致飢飽勞役輕則因而成疾重則致命者往往有之家有疾病死亡之憂而不敢離衙門者有之如此怨苦皆原于妄申妄受當決不決擬合遍下照依條畫司縣當決而不決妄行作疑申州申府者初犯品官罰俸司吏杖罷再犯三犯則品官解任州府總府妄申妄受者亦如之合行移牒請照驗申臺照

詳乞賜明降遵依施行

精選縣令

辦事愛民莫親於縣令縣令得人則事辦而民安舉非其人則事不辦而民失業即今縣令多非其材省部不務精選兼品秩卑下州府驅委呼召殊無禮貌英俊才氣之人視不屑為十分為率大半不識文墨不通案牘署銜書名題日落筆一出於文吏之手事至物來是非緩急閉口不能裁斷袖手不能指畫顛倒錯繆莫知其

非雖有縣令與虛位同今後擬注縣令省部試以身言書判問以治民之方年六十已上精神才力昏耗者不可擬注身言書判不兼全者不注省會州府不得差委賤辱

論併州縣

州縣何為而併也戶口寡而官吏繁民力不足以供培克十羊不足以容九牧也併州縣則其便有三減祿食舒民力一也每縣胥吏鄉司里正之徒五六十人并祇

候弓手足解不下百餘人每家歲用衣食鈔百貫舉取足於民今皆廢罷而民免蠶食之苦二也每縣又得五十家務本趨農昔為蠹民之害而今為納差之戶三也其不便者三縣併則辭訟賦稅遙遠一也巡盜賊尉司勞苦二也二者不難治平解紛糾警察寇盜則委商酒務主之無致生發無令起訟賦稅遙遠則仰本縣當絲銀徵納之際各就本土置官收受無令百姓勞苦如此則省併州縣實為善政不必多論俟其戶口增息政

繁事冗則量宜復置外戶口鮮少不宜立總管府者亦當合併衛輝等處是也宜立總管府者復當合而為一東平是也難者必曰併之則頭項有言是大不然土地城邑仍舊戶口差撥仍舊各頭項所設達嚕噶齊仍舊官制禮儀既定為總府者不敢無故呼召凌辱州縣然則何苦而不願也兼自天恩列土以來衆統寡大臨小行之到今五六十年而無一言何獨至於今日而有言哉其實一縣也一州也強名之為一路是蒙虛名而受

實費也難者必曰併之則總府權重是又不然往日諸侯世官擅生殺禍福取斂封植之權故一方愚民不知有朝廷之尊而知有諸侯也今之總管府有如是之權歟常賦之外不敢擅一錢流罪以上之刑一一申部五十月而遷徙何重權之有何過慮之甚也難者必曰鄉民之情升縣為州則喜降州為縣則慘然不樂是又不然民可使由之不可使知之得虛美而受實禍小民之言何足恤哉難者必曰往年辯者以減併州縣促削封

疆恐為外人所笑是何理之言也夫所謂之促削者千里之地為他人得其九今也為百里百里之地為他人得其五今為五十里毀千雉之城為百雉是所為促削也土地如舊城郭如舊何謂促削哉使田野不闢戶口不增雖升縣為郡升州為京張夸名而無實用然則何益矣不知反為後人之大笑也此皆一時蒙昧便佞之空言今已不辯而自明亦不足恤

論府州縣官

府州縣官不合一例俱年老或年幼俱識字或不識字
每補一人宜照已任者何人宜老幼文武間有不合勿
止問此人合作刺史止有某州刺史闕便令補上不問
見任諸員何人又用此人為同僚無乃偏枯否按察司
最急當舉府州縣定功過朝廷既有五責辦集者不辦
集者俱一律遷轉何以懲有過勸有功而合周官六計
弊吏之旨哉

民間疾苦狀

一逃戶不能復業

今日離業明日官司將拋下物業便行典賣訖

一見在戶替代逃戶差發

假令元抄十戶逃訖五六戶見在戶包當

一稅屋間架

古今並無此例木植芭灰丁線已行稅訖今又稅屋甚為重併

一稅羊重併

既於每羣內不計多少抽分訖羊口又行收毛收皮納稅每遇造作復於民間取要

一本場皮貨山查河泊冗事合行革罷併入稅務

一稅物不問時估止由闌頭合千人等高下價直以憑

取稅

一婚嫁之物既非買賣營利不宜收稅

一站戶既當馬匹又當祇應酒食委實重併困弊

一一切和雇和買造作并不得錢近年親管官吏擅行和買虧價十九

一社長並不益民止助貪污官府鳩斂錢物侵剝細民合行罷去

一府州司縣每遇祇待使客自裊褥床榻油鹽菜蔬酒肉碗碟匙筯柴炭等物一切科斂於民使客既去諸物為之一空並不還主

一徭民甚多正當差戶極少當議減革

一自立竹監并巡行官以來不勝煩擾民竹十廢八九
官竹十損六七當罷竹監及巡行官民間許令種竹依
價收稅官竹委付土官一員掌管發賣

一巡鹽官不得擅自擾民事發之家當土官鞫問

一鹽法頗壞斤兩不足當依舊法滿足民間食鹽聽從
商旅兩平貨賣官司不得椿配

一白著無名錢宜許赴按察司陳告

一凡遇和雇和買夫役不問多寡即行遍科宜嚴加禁治

一親臨官和買和賣藉補宜行禁斷政弊

一冗司當罷

省部臺院外酌古則無有準今則繁冗者皆當削去

一冗員當減天無二日民無二王尊無二上人無二首

故設官分職省部以降崇卑雖不同為長之官止合一

員佐貳僚屬視事之繁簡則或倍蓰焉長官一員則裁決歸一而不紛競僚佐倍之則常務煩多足以代勞即

今六部尚書八九員侍郎郎中員外郎及一二宣慰使
七八員同知副使各一人正如人二身八首而一足貽

笑千載舉此一二他可類推

最不適用虐下生事虛廢俸錢鋪馬祇待者宣司奏

差等官宜
十減八九

一冗吏當減

一冗文當革冗文不革則冗吏不能減何為冗文無妄
受無越訴無疏駁不法無申呈無度如是則冗文十去
其七八

一取人入仕無法合行講究

即今冗員既減十之四五有罪者罷無罪者聽除亦

可經數選而不闕

一江南重地難得易失所任非人合行精選

仰按察司體察罪重

者去輕者降留無功過者依例有功過者分別

一濫官雖罷私賊富厚宜許諸人陳告復還本主彼此

俱罪者入官

一諸路庫藏倉廩有名無實當從實點勘

一公家與民爭利衙門宜有革罷

一錢穀官不宜貨賣宜於隨朝服勞人子弟姪選用
一不經省部銓注職名如本路奏差提領驗數官知數
河泊官之類宜盡行罷去

一官吏斷事無法可守當議頒降條法不致罪一而刑
異姦吏因緣高下其手

一諸路戶計東移西竄南徙北遷消乏者不減差興盛
者不增賦宜委本路公舉廉慎官同按察使官一員從
宜抄數仍具戊戌壬子兩次何處附籍仍具本家見在

物力除為清冊以憑從實定奪差賦

一江南平定通為一家南民即我民南兵即我兵也既有券軍使令北軍宜少休息每歲輪番一半南戍一半還家作活資養軍力

一不因才能勞效門閥以錢得官者宜盡行退罷即以才能勞效門閥之人代之

一宣使奏差一切使臣不問土官有無罪犯下馬便行取招重行打發輕則土物斂及於民宜行禁斷差帖上

亦不得妄寫惡言徒使朝廷失大體而不威官吏無恥而苟免

一某自起身至據台鼎專以賄賂左右迎合上意為務故能使受賂者投間抵隙交口薦譽迎合偵伺無不如意自斯人顛覆以來受惠者一無所得思慕之心追懷曷已相繼為政者循覆轍則不可新易途則招謗謗言日多不惟不能施為雖欲身安其位庸可得乎當自侍御僕從有出身有賜賚以代私恩不使怨怒不惟立酬

勞報功之令典亦庶幾杜絕苞苴賄賂私相思讐之罪
念

一江南民心未甚結固不可屢失自收附以來兵官嗜
殺利其反側叛亂已得從其擄掠貨財子女則入於軍
官壯士巨族則殄殲於鋒刃一縣叛則一縣蕩為灰燼
一州叛則一州莽為邱墟然則於國何益矣申院申省
反以為功朝廷不究詰所以反叛之由而慣賞其將卒
定亂之勇人情孰不欲安屋粟火食夫耕婦織賦役之

外養老慈幼樂享太平此億兆之一心也今也棄此遐
福去生就死甘為肝腦塗地父母妻子駢首受戮者是
何心哉是蓋牧民者有以激之使然前省所選人員例
以賄賂得官屠沽駟僮市井無賴羣不逞之徒十居七
八詩云愷悌君子民之父母使若輩之民欲民之安則
不可得矣淫奪人妻子強取人財產田宅馬牛羊畜聽
訟之間恣情枉法以是為非以非為是百計千方務在
得錢民之冤抑無所控告司縣州府上下一律哀聲怨

氣鬱積而不能發所以冒死而不顧國家自平金以來
有事於宋五六十年而後混一豈不艱哉良將精卒經
營戰鬪於數世一旦以濫官汚吏恣其貪殘而壞之惜
哉

一江南陳米經歲既久皆不可食今已水旱脚力運漕
於委曲萬餘里之外何不思之甚也以致沈船破車奪
民時廢民力死損牛畜虛損盤費官吏不能交割多自
經逃竄所運米石堆積水邊上雨下濕腐朽敗爛積今

四五年間問根起發斛數若干今到某所某倉若干已
十損其七八矣所存者又皆為糞土若此繆算即合停
罷

一御史臺按察司彈糾貪污申明冤滯實省部儲司之
藥石也省不知與已為助反視之如仇讐百端沮抑是
以近年以來當是任者全身遠禍閉口不言為書吏書
吏者委靡貪污與州縣吏無異甚者反與之文過飾非
隱比其罪惡滋長其貪冒自今以往當激勵振作碌碌

無稱者退罷少犯賊汚視州縣官吏加一等治罪終身
不復叙用

一倉場庫務諸錢穀官雖非所以處清流待英才之地
亦無以市井細民賂以貨財而可得者上以財賂賣之
下以貨賄得之上下交征利又無出身欲戒人以不盜
何不起之甚也即今賊汚之弊莫甚於此愚謂宜准往
代舊例以待有功之子孫有月給有增秩拜官盜錢得
罪之科如是則國無賣官之羞人絕僥倖之念錢穀入

官而不入於私家人矜廉潔而有光於祖考茲事非難
當革前弊凡隨駕日久如集賽台等子姪弟兄戶選一
名補注不願者聽責成於漢人以蒙古人領其事而不
課其殿最

一前省官私心本欲貴其子孫恐人有言故每職多設
冗員如六部宣慰司之類是也或以貨賂或以請託不
論人材不遵銓調昨日一布衣今日受三品命服日月
不深資品卑下而遽陞二品宰相者股肱之寄往往皆

帶相銜遂使僥倖之徒視名器如拾芥卑小官而恥為
曰某人尚得某官我何為而居下列曰某人尚拜某爵
我何為而受斯命輕易名器以至於此當議改格

一遞送造作必不能無弊姦吏因緣害衆合著夫匠十
名乃科百名以至數多則遍科今後省部立式符下各
土主者置立簿集鼠尾人民及工匠花名遇有遞送造
作輪次應當周而復始仍令通文墨廉慎官吏封掌凡
有遞送前路文字及宣使奏差到路輒不得便集人夫

先差人於前路探伺到來的實月日然後集衆若恐耽
悞既承文字即於簿集上照勘某人今次該差計幾名
公文先報得知管得在家聽候續聽指揮某日須要到
來應役如此則公務亦辦不致稽留農工妄奪民力盜
養姦吏

一拘刷牛皮之虐農人牛死舉家哀號不經申官不敢
開剥筋角皮革略有損壞又復壞錢或時值暑月入城
遙遠往復之間肉已腐爛近日復有濫官下村親行拘

刷或翻挑舊事或每活牛一頭攤鈔五百一貫似此虐政即合罷去合用牛皮新納包銀不勞而足

一軍人應役還家一往一來之弊軍自分撥以來紛擾重併民不勝其困弊吏橫恣其姦欺何以知之假如一戶軍戶某人係某縣某村元籍某年為始簽作軍戶根脚係隸某官帳下應役到今不曾改撥如此則或有軍前因事因病身故或避役在逃交替不至或貧難疾病單丁不能應役或元籍戶頭身故子孫更改官名及一

切事故管軍官照驗各人鄉貫姓名移文本管鄂勒官
勾追補發若網在綱有條而不紊自一經分撥別隸他
人所管行伍不相識官吏無籍冊可照一憑本人稱呼
中間不無欺詐不惟如是或又於某年再經分撥或又
於某年某歲累經分撥遇有前項事故展轉推求不見
根脚出軍吏人亦非經手舊更是以妄行移文勾追鄂
勒吏人照得與元籍姓名點畫少差却行迴文審問一
問一答往復經歲軍前既承迴文不無自疑遂於他路

勾喚似此紛亂純實謹畏者恐遭罪責或已行親當又復雇覓或兩處重當不能辨明不得交代以至壞產破家無處申訴不畏官法敢為姦欺者賄賂鄂勒官吏通同作弊或在家而云已行應役去訖或富實而妄言貧難或身在而言身故或有餘丁而云戶絕或妄以鄉貫村莊姓名爭差為問逗遛歲月似此欺蔽不止一端究其受病之源皆出於分撥奇零隸屬無定即今南方無事管軍官員數太多名為萬戶軍不滿千千戶軍不滿

百降至鎮撫百戶有止管二三人者是所謂十羊九牧者也照得管軍官員亦非皆出於累世將家勲舊武弁以一時軍功得官今乃袖手癡坐無高爵之可邀無厚祿之可得無精兵銳卒之可管意亦顯望國家優恤莫若檢照各官如根脚尚日淺年老無子姪可代者與一優便差除祿以養廉軍官既減則散軍可併散軍可併則可復無籍可併可復則選擇良將善撫馭者於要害重鎮屯戍以之鎮守則威重而姦亂不生緩急有用則

精銳成師而得力往復交代及一切事故則不能致肥吏而瘠民欺官而悞事

一鈔虛之由有自來矣盜臣私印添價以買諸物一也置立總庫總局舉放出息輕付於無賴狂貪買官之人動輒千萬錠二也鈔法無定鈔十四兩八錢當金一兩即今官買金每金一兩該鈔一百五十貫自壞其法三也賄賂公行執權者止要良金美女俊馬奇珍百倍其價物重則鈔輕四也盜臣得以私印諸路官庫反不支

發民間無以倒換五也近年以零鈔消磨盡絕上司並不印發零鈔不行物價自重六也能除六弊鈔法自實一前省官自謂於國盡忠靳惜財物不敢妄支虛費遂於諸投下五戶絲銀歲賜暨諸犒賜等物不肯依時應副巧計開除不滿合得元數所與之物金銀匹段亦皆低劣不堪使用衣著今次事發為人首告假銀足為明驗實失諸王心怨歸於上何足以為忠古人親親之義分寶玉於伯叔之國時庸展親恐不當如是

一碩布呼齊每戶要訖鈔半兩或一兩二兩

一燒經排門取訖鈔五錢僧道每路不下五十錠

一今次貪人所積贓物不啻數萬錠其實皆出於生民之膏血惟數宜與民休息免絲銀或三年或二年統體受痛不立法不選人無賞罰貪貨財土地取兵取民無制度御臣下法寬而不禮重易進易退百官苟且趨利無貴賤等級職員太冗俸給不足員冗則論議紛紜而事不集俸薄則生理不給而生貪污以今觀之每一司

分莫若減員之半而倍其俸

一即今銓調之法名存而實亡近年以來賄賂公行所謂緒餘土苴併自廢壞錢多者其職切要其祿厚其官高其日月經久而不遷轉所用之人無行檢無才能無門閥無勲勞無智識不責王事之辦集廢墮而不卹部民之冤苦失職提刑司恬不彈舉無錢者雖負德行才能門閥勲舊或任滿而再不選叙或莅任未半歲一歲無罪而替罷亦不錄用惟僻遠荒邑職不切要者或七

八年十年無人交代然則吏部官可不精選公平廉幹者躬親考校簿書內外司分計若干孰賢孰否孰功孰過孰年老疲軟不勝任孰年壯精力才幹人人見來歷人人如素知識某司某分當用幾人文資武資宜幾人某人因某功而陞遷某人因某罪而降黜使陞遷者知非微倖廢罷者不敢怨言如此則趨事赴功得賢日廣一府州縣司吏所以遷轉者本恐年深作弊自遷轉以來其弊愈深其誤事愈甚何以言之人之所趨惟名與

利照得府州縣司俸薄不足以利家辛苦年深不得入
流品無利無名復何顧藉不貪污不枉曲何以度日兼
吏人之職專主簿書案牘之首尾公勤才幹者聽從本
官及上司呼召指使之不暇安能經理上項所當知之
事哉是以問東而不知西問首而不知尾一聽於主案
貼書之所可否而况貪賄賂殖貨財奉官民避強凌弱
庇富虐貧非主案貼書則不能也以此論之反不若不
遷之為愈也居父母之邦羸有田宅產業賴公門庇廕

足以養廉人情物理彼此不能相欺謾不親即故人非豺狼遇事豈不相憫恤案牘出於其手不勞苦而嫻熟知首知尾其涖於其職每事不敢苟且恐後不能離手豈惟吏人至於職官自循末世避貫遷轉之法亦不免此弊不務擇人止務遷轉甚非良法使為官為吏者性果廉平雖居鄉黨亦廉平性果貪曲雖處異鄉亦貪曲避貫如以狼守羊何往而不殘食之也罷遷轉務擇人使鄉里公共推擇俸足以養廉公平歲久則得入流品

庶幾簡易而得人不撓法不害民不誤事

一某前任河東按察副使在任別無他能惟不妄拘錢入官吏人有罪杖而不罷一事頗異於同僚錢至彼此俱罪者入官拘收濫官污吏以形勢知術而強取民財今復入官是何異於濫官污吏之所為哉後雖有欲訴者則曰我所以不避官吏之宿怨含怒控告於上司者庶幾得吾之財耳今復官為拘管徒取怨官吏反貽後患曷若不申告之為愈也吏罪不罷者縣吏革罷而陞

州府州府吏革而陞於省部臺院與其害天下多曷若害一縣之寡害一縣而得罪猶有巡按官之杖責害天下之大孰問而孰責之哉

一里正輩不催差抑勒上户一弓手擅拷掠作威福政令有一言而事舉者不必費辭費力當一一舉行一日不能書字一萬者不補貼書不能裝卷試案式者不補諸吏不識文字者不補縣令但犯贓汚者品官落職永不叙用不能騎射者不補縣尉人驗歲月宜有出身親

親以惠與民休息立法擇人射占納租開草地恩詔罷
土功立法租庸調閱實戶口物力開荒免五年減免租
稅不任軍役辟舉守令五年一遷江南立王府革罷諸
省宣尉司等不急諸衙門推排軍力一百戶為十甲驗
力均當買賣土田當立定制革罷中原不急諸衙門如
淘金之類金玉人匠禁斷奢侈淫麗定立等級聘財喪
費屋宇衣服筵宴程試僧道儒醫及一切入仕官吏抽
分羊馬拘刷牛皮筋角抽分私家竹貨之類皆宜罷去

吏治雜條

一身正無私門無雜人

一詞訟省減

推擇謹樸老吏給印寫狀毋受越訴經司
縣斷而不服者鈞卷詳度縣斷依法則反

坐妄告人違
法則坐官吏

一不投下好尚

一獄無滯囚

獄囚起數置一牌面日在几案斷訖則勾
抹新添則標錄未斷者細標注緣故日日

省問審
斷此法

一六房朱銷

日日省問觀監斷
決增添日銷日附

一鈴束吏人非事故白晝不得出離各房卯酉歷嚴謹如私事公務妨奪明白標附

一承受鑒發委審慎公勤者主之與朱銷簿時復相對以賞罰勤惰

一差撥辦集推唱均平勸率怠惰務農者務農雜業者雜業精勤專一

一游手好閒者鄰社舉彈宣限不可不遵毋遲毋速遲則違限太速則二月賣絲五月賣穀矣

一盜賊息無不業之人無外來浮脚之戶無不識姓名
客寄不成戶單丁之人謹慎勤苦不幸疾病死亡或凶
歲不給者官為扶持或律助口糧或減免差發毋致無
賴

一田野闢開荒者五年勿役仍減免雜役

一復逃亡到任便取實在并逃訖數目申部復業者免
三年差發無事產官給荒閒地土元拋產業或為他人
所有官為贖付

一館舍修整具備器皿全酒食美肉菜米麵精緻鋪馬
肥壯館人勤謹毋捏名項

一倉庫完固防慎火燭巡護嚴密

一橋梁以時修葺須要五月一日拆八月一日搭

一詞狀置簿即日便行毋落吏手

一街衢巷陌潔淨無穢

一牢禁嚴固潔淨溫涼

一更漏分明依時夜巡如法

一弓兵有職分里正人毋得侵占

一公門人無故不得下村

一風俗淳儉冠婚喪祭一一從儉祈禱義社即皆住罷
到任省諭

一強宗大姓侵凌細民體察禁治

一減主案貼書主案一貼書二三餘並削去

一循分毋顧忌毋妄申毋妄下當行者即行部符不便
於民者當折申即申毋便行下州縣

一印章朱語正貼無朱語者不得題判判署官或有照料不及雖更題判若無朱語者職印不得使印

一不倒題日月不押虛催無益于事徒使吏人欺怠

一本命刑禁日當直吏人明書于小銀牌面置在几案曰今日某事某事

一和好隣境凡有急速使臣或不測事情差坐馬人預相報知

一六房吏弊當周知其情毋為所賣鋪兵有人應役頻

勾正身本是鋪兵守把城池別無巡哨攻戰管軍官為
本人會手藝不放交代甚為良苦近年以來軍人分撥
奇零輾轉別隸部伍新管官並無簿籍或有逃亡事故
不知鄉貫及戶頭官名公文追勾不無差錯以致吏人
受賄作姦文字來往逗遛不發亦有軍人小心謹慎避
怕罪累重併應役此段前說備細言之合申省部密院
詳察

一問獄以情箠楚之下何求不得弓手及尉司官吏畏

避踰限罰責又本性麤暴殘忍率多執平人妄恣捶撻
苦楚捏合指示虛令招認獄問初情如此難以推究今
後尉司獲賊毋得監禁稽留擅自箠楚便當縣令以次
公廳羣問得實止于縣司牢禁申解所屬有司推問之
法止問今次所犯使首尾情實若犯人因推問其間情
辭別有可疑說出它事者亦合鞫問如無此情節不得
曲加凌虐轉生餘事

一工本管諸色當明置簿籍紀錄戶丁標注應役不應役

遇有造作輪番斟酌勾喚毋使吏人通行騷擾作姦受賄虛奪工力

一戶差發夫役不均在家申逃每于逃戶處斂訖差發却于見在戶科攤

折獄雜條

體認所爭者何事人命 盜 姦 錢債 婚姻 良賤 鬪毆明察詳審元訴人辭理與事情有無相應如不相應且放從說說過俾再三復說或差或否理短者折

之情隱者鈎之語言便利者勿便以為是蹇訥者勿便以為非膚受之訴世俗所謂情理切害者勿遽先入于心察言觀色詳情慮事不出乎理理明則情不能逃引問被論人明告以被論之事令一一縷細抵對時曲直真偽自見一鈎一距必窮盡其情而後已大抵元告被論辭固無有不差因所差處互相詳察亦自辨明每事皆有根底旁證來歷情由當從實處一一推究干證勸和人最為緊切君子善人畏避官司中間別無偏

向者其辭簡直明白或闕親戚或圖錢物酒食或挾讐
怨或避形勢或受囑托有一于此不無偏向辭理逆順
輕重不可不察與元告事飾辭增減者有之與被論人
辭理或排或助者有之聽訟者若便止憑干證不無冤
枉不憑干證無所依據凡引干證人便先窮問與元告
被論人有無親戚故舊錢物交往因何兩家指為干證
則情過半矣干證情實見則事可立決

仲弓問政子曰先有司不先有司則不惟越訴事繁吏

人因緣為姦抑實有不可隔越而問者又曰無情者不得盡其辭若無情之辭便為受理雖有明斷之材衙門必不能清簡二者當從古人凡人告狀官人當先熟讀其文有理無理寫狀人中間有無潤飾亦可見其過半當先引原告人當廳口說所告事理一一與狀文相對同則憑狀鞫問不同則便引寫狀人與告狀人對辭若有與口辭增減便決寫狀人亦減止無情妄告之一端耳

上失其道民散久矣如得其情則哀矜而勿喜民情與政通先知時政然後知民情夏尚忠殷尚質周尚文至於後世政治雖不及古豈無所尚乎所尚者民亦尚之究其源之失知其流之差不可誣也無或偏聽於獄之兩辭

五聽之法當熟知言察情明理鍊事四者胷中了然且無一偏之喜怒雖百冗坌集于前皆可談笑而決何必疲精勞神怒罵揮斥撈掠捶楚然後為得也若夫情見

勢屈而不聽命先之以正言申之以感悟無不從者柔
能勝剛弱能勝強溫言可以化人理到之辭不得不誦
聽獄之法靜則明明則百姦不能逃其形切忌躁急躁
急則己心先亂譬如撓水搖鏡焉能鑑物哉細民之所
爭若無異事不過婚姻良賤錢債土田戶口鬪毆姦盜
而已此皆縣令之職令賢則必不至於上告至府至府
而又不能決決不能服人良可恥也素餐之誚孰大於
是

當置狀簿辭一冊便給縫印府官押訖每日新狀當直司吏隨即當廳附籍便令承發司布散合該人吏既畢隨手朱書吏人姓名於隨狀條下次日便令覆說無理者便退與原告人有理者施行但凡州縣可決者隨即批送必不可決者狀尾批令自勾此亦減吏權而除冤滯也府官五日十日一銷照

十月一日務開三月一日務停首尾一百五十日每月先除訖刑禁假日四日計二十日又除訖冬節年節前

後各一日計六日兩月一小盡除訖三日立春節除訖
一日進年節表一日乙亥日三日若遇二月清明節又
除訖三日計二十七日中間或遇同仕上官下任吉凶慶弔
迎送上司使客大約又除訖十餘日總計五十日餘外
斷決詞訟者止有一百日或遇兩衙門約會相關或干
證不圓或勘會不至或吏人事事故轉按疾病上司經兩
勾追刷案之類吏人手又虛訖十餘日中間止有八九十日理問辭訟
又以監視造作勸農防送遞運府州追勾按察司差委

得問民訟多不過五六十日聰明疏通公勤廉幹者能決幾事若賦性愚鈍稟心私徇反為姦吏愚弄文字逗遛倏忽之間又復務停所以有十年八九年不決之事此蓋為十月一日興辭到官者言也若或正月二月才方告狀務停三限更甚迫切推原務停之政本恐妨農不知正墮姦吏倚法舞文之巧計以此觀之不若不立務停之限止取稽遲不公之罪必不敢至於數年之不決今後品官得代計在任月日經手事久不決者降黜

責罰得代之日按無不決之事者陞遷褒美

不遇無法而亂不見聖人之治功不值叔世之苟且而
徒法不知聖人之防患而慮遠姑以田制言之三代經
野有法不惟務本地著而民和至於一切紛亂詞訟皆
無自而起自經野無法田不隸官豪强者得以兼併游
手者得自貨賣是以離鄉輕家無父母之邦無墳廬之
戀日且一日千年田換八百主交易若是之煩因地推
收稅石之冗官吏姦蔽出入挑攬獄訟萬端繁文偽案

動若牛腰一語抵官十年不絕兩家爭田連村受禍廢
奪農時破壞產業視骨肉為仇讐化鄰里為盜賊飲恨
銜冤死莫能解一鄉一縣雖素號淳厚者亦皆變為姦
欺詭譎頑嚚健訟詐造契券硬作佐證府州司縣惟利
是視以曲為直以非為是上至臺省濁亂尤甚吁人之
積怨含怒與日俱深良可寒心官府風俗敗壞至此刀
筆賤吏猶以刻剝徵求斂聚貨殖為忠勤簿書期會為
急務為明敏此乃田訟之一端至於科差之不均軍旅

驛站之偏枯見在戶代當逃戶差發之寃抑酒醋稅課程之增額利歸於姦貪之手禍及於無告之小民刑獄之淹滯略不詢問赦恩之頻數縱放凶殘內外百官賢不肖混淆幹局廉潔者招謗惹禍貪污委靡者歲得美除出條款則虛文嚴密責實效則百不一舉軍籍民籍點竄改抹略不可憑錢穀出入漫不照算官不知法吏不識字身為軍卒而不識弓矢名隸工匠而無一器具僧道則有妻有妾飲酒食肉趨利無厭醫藥者不知方論

素無學術狠忍殺人中選儒人不經不史不文不詩不修身齊家渙忍無恥冒虛名而求美官尚口舌而無實學標置自高致行同市井上下無正法是非無公議妍醜無明鏡重輕無權衡曲直無繩墨焚絲沸羹莫之分辨具曰予聖孰知烏之雌雄唯此時為然

論有司不立常平權衡高下一出於編民

物有餘則賤不足則貴固物之情也然而乘時徼利賤入而貴出亦市井之薄俗近歲農民亦為壟斷之態寧

取倍息之稱而買穀麥欲乘其雨不時降新不接舊物
價為之湧貴而售也是以今晨物價若干日夕物價若
干朝貴暮賤朝賤暮貴若翻覆手乘其逐末者日求升
合而素無蓄積耳有司畧不介意坐視其紛紛無定偷
薄姦弊日甚一日然則古人常平權衡可不設歟

丁糧地糧詳文

近為民戶張忠買到軍戶王贊地二頃五十畝又令張
忠重納地稅事申部除豁不惟不准五致符下本路問

罪今來若不再行申呈地一也而曰軍地民地稅糧一也而曰丁糧地糧是蓋因人以立名因名以責實因人以推收義例甚明當丁稅者不納地稅當地稅者不納丁稅自立此格例以來未有併當重當者也近年以來破壞格例既納丁糧因買得地稅之地而併當地稅或地稅之家買得丁糧之地而併納丁糧如此重併府司屢申終不開除反致取招問罪不惟案牘繁亂名實混淆軍民重併使國家號令不一前後失信省部見小利

而不究大體以瑣屑俗吏之言為可聽俗吏不惟不知理義且如一話一言先自差失何以言之所以名曰丁糧地糧者地隨人變非人隨地變也今日隨地推收先自失言合曰丁糧地糧隨人推收則不待解說而事自明白政自歸一民賣與軍地除四頃之外納地稅軍賣與民地不問多寬止納丁糧豈不簡易正大不費辭說若中間作姦造弊偽不以實嚴立罪責各有所歸則自無詐冒伏乞照詳

論倉糧

每歲稅石無問年歲豐歉務要應期而足鼠耗分例之外計石二三可納一石穀精細乾圓然後入倉加之遠倉人功車牛往返月餘所費不淺下之供上不為不勞所謂剝口體之脂膏而應國家之急用竊見河倉暨京師倉並無教房皆作露囤不一二夏舉皆陳腐臭敗以致馬牛不食復借之於民石得八斗又以農忙無力搬取賤取其本而棄之如糞土秋成徵還加倍不能償是

國家常稅本該一石新舊併徵計以加耗而併納三石
矣其餘為官倉船戶失陷者不可勝數事發到官枷紐
連歲無追徵者省部明見此弊畧不置議愚謂倉官各
選品官廉慎幹局者充增餘失陷明立賞罰以每歲所
著錢或減租稅之半折納交鈔以二項錢偏置教房實
為便當

匹夫歲費

父母妻子身計家五口人日食米一升是周歲食粟三

十餘石布帛各人歲二端計十端絮二斤計十斤鹽醢
醢油一切雜費畧與食粟相當百畝之田所出僅不能
贍又輸官者絲絹包銀稅糧酒醋課俸鈔之類農家別
無所出皆出於百畝所收之子粒好收則七八十石薄
收則不及其半欲無凍餒得乎又為以上三四十家不
耕而食者取之所以公私倉廩皆無餘蓄矣


試典史策問

即今司縣司吏起身寒微素無祖考遺留產業貲財本

身不會士農工商止仰月俸養廉然而食則梁肉衣則羅紈鞍馬奴僕與品官無異妻妾首飾金珠衣服金錦文繡與命妻富室無異所居之室高堂華屋不知所得從何而來假有編民游手好閒頻飲酒食肉必為鄰人弓手里正所疑此人不務實作活每日如此受用伺候刺探得錢因由必得其姦司縣司吏奢華如此畧無一人窮究詰問反致當路權要保舉廉慎未委虛的仰一
一答問

古今設官置吏選取人才為官者必須通曉政事長於判斷推勘刑名詞訟使民無冤抑推排差役賦稅貧富均平六事皆辦百務具舉斯為稱職為吏者案牘明敏刑名嫻熟無稽遲無違錯斯為稱職不稱職則自有彈舉之有司不才者合退罷則退罷今皆不然取勘歷任月日動皆二三十年試以才能則百問而百不知豈有身為吏人不識字不解書算不通刑名案牘止以勾當年深縣升之州州升之府府升之部部升之臺院都省

出職為品官當要職外任則承流宣化內則參決大政
綱領郡縣取人如此是邪非邪為官為吏不自慚懼猶
懷悵怨職小官卑以為虧已事當何如仰一一答問



欽定四庫全書

集部

紫山大全集卷二十四

詳校官庶吉士_臣朱理

侍讀_臣孫球覆勘

謄錄舉人_臣范翔集

欽定四庫全書

紫山大全集卷三十四

元 胡祇適 撰

語錄

中庸一編子思子為人之不知所以為人不自貴重而作也天生萬物人為最靈得天之全能循其天之命我全其性之良能明善正心修身非法不言非道不行夫婦別父子親兄弟睦長幼序朋友信自天子至於庶人盡其職分之所當為不少闕不踰越貧富貴賤順受其

正如是而已偏為氣稟偏駁而不純全昏濁而不清明
或過或不及而失中故聖人以身教之又擇其能全天
德者為之師至於一家之內則父為子師夫為婦師兄
為弟師長為幼師此自然之職分也以其間有頑父嚚
母不能為子弟之師故使之家有塾以至國有學使人
人孝悌忠信循序而和則天地萬物育所以刑措而
不用四海猶一家篤恭而天下平矣

始言天以全德付人萬物皆備於我不可不存養省察

中言聖人法天建功立事終言聖功神化卒肖天地而後已天命性道教中和庸忠恕鬼神孝知仁勇誠明聰明睿知寬裕溫柔發強剛毅齋莊中正文理密察溥博淵泉敬明勸威不大聲色無聲無臭

中庸一書中為大本和為萬殊萬殊所以行其中也無所乖戾發而中節曰和中節者時中也中節則和和者中之功效也庸者平常不易也惟中則能如是一有偏倚過不及雖欲暫而不可況今日如是明日如是久久

平常而不易者也庸者中之立也久也誠者實其中也
明者中之鑑也人能中立則上下四方是非邪正情偽
賢不肖莫能逃其鑑照推而至於參天地贊化育如堯
舜文武周公孔子此中之聖功神化之極致皇極之全
體也故孔子曰不得中行而與之孟子從而解之孔子
豈不欲中道哉不可必得故思其次也

中庸一篇天人為一本非二物以天理統人事明天理
聖人則合乎天也大賢君子則克己復禮求同乎天也

小人則不知而背乎天也天能賦與而不能言聖人代天理物心得躬行以立教垂訓使天下之人皆合乎天得自然之性行當然之道實固有之德亦若生知安行成已成物擴充推極養而無害聖功神化以至無聲無臭與天地同德而後已

天以大中至正停停當當無餘無欠無妄偽無乍作遽息無過不及無惡無凶無昏蔽無私無我無固滯不通無不仁不義無禮無智無乖戾不和周圓具備之理付

與於人人反其天不能全其天而入於邪惡故子思明
善消惡欲人人之復其天也

中庸一篇只篇首三句命性道教四字該括已盡已後
三十三章乃四字之發明子思子恐後學之不擴充以
至其極故不免實之以前聖嘉言善行完備四字之體
用耳至於伏羲文王周孔之於易諄諄切切丁寧反復
縷陳數說恐後人之不能明了耳至於大學語孟詩書
春秋亦此意也

中庸綱領命性道教中庸和知仁勇忠恕鬼神孝郊社
禘嘗誠聰明睿知臨寬裕溫柔容發強剛毅執齋莊中
正敬文理密察別溥博淵泉尊德性道問學致廣大盡
精微極高明道中庸溫故知新敦厚崇禮肫肫其仁淵
淵其淵浩浩其天

人之學道貴知原委貴得體用貴切己貴識權知是四
者由博以求約萬而一一而萬有綱有目本末不紊則
可以達道入德孔子沒周道陵夷民不興行賢智者失

之太過愚不肖者失之不及不知道之大原出於天備
於性成於我以口耳為學以計術為智才能為賢子思
作為此篇首言命性道教皆出於天人肖天地以生當
肖天地而成已成物毋墜天之降寶命聖人則不惟如
是而已雖天地萬物賴聖人以位以育所以能如是者
不在乎他循其性之自然適乎中而已性之所有者五
接於人倫則為五典非知足以知仁足以守勇足以行
誠足以成則不能全其天復其性矣故以舜之智顏子

之仁子路之勇實之繼以舜文王武王周公受天之太
命全天之至性行天之大道代天而立教四聖人者功
及於一時故終之以孔子雖不得天位而立德立言垂
教立功及於萬世集四聖為大成又有賢於四聖聖功
神化天地造化之所不可及者孔子為之輔相裁成無
聲無臭與天同德然則子思之言豈不昭昭矣乎天人
果為二乎人之學道果能出於此乎

靜能不偏不倚而大本立大本立則天地位故動能中

節而達道行達道行則萬物育立之正謂之大本行之
通謂之達道

道也者不可須臾離也子曰誰能出不由戶何莫由斯
道也人無貴賤賢愚萬古一日萬人一人出必由戶戶
即當出入之正路也人倫自有正路自有門戶人而不
由道出不由戶也教衰俗惡可哀也哉

戒慎乎其所不睹恐懼乎其所不聞耳目之所及不過
百步已不詳審寡聞淺見日用當行者不著不察況耳

目之所不見不聞者乎道之體用大包天地細入微塵
無所不在可不戒慎恐懼乎視於無形聽於無聲賢者
尚爾矧庸人乎此則當知道之無外廣見聞而遠視聽
慎獨則當知道之無內一毫私邪不萌於心也

暗室屋漏謂之隱念慮萌動之初謂之微孟子曰作於
其心害於其事作於其事害於其政邵康節曰思慮一
起鬼神已知此子思所以慎其獨也

民鮮能久矣何也惟皇上帝降衷於下民雖於五常萬

善反身而誠其氣質之偏賢者知者常失之過愚不肖者常失於不及或乍作而遽息日月至焉不能恒久而不易是所以民鮮久矣譬如飲食之美惡人皆知之亦有各嗜一味之偏不知酸苦甘辛鹹淡得中之正味況道之中庸乎故子思著中庸一書使人知道之體中而已道之用庸而已庸者平常恒久而不可易和在其中矣中之一字大矣廣矣天地萬物莫不在是一寒一暑中也一陰一陽中也日往則月來月往則日來中也五

行相生相勝中也一晝一夜中也是所以謂之不偏也不倚也無過也無不及也大本之所以立也今日如是明日如是今月今歲如是至於萬萬歲恒久不改易而如是是所以謂之庸也達道之所以行也所謂不易之定理也非中則不能庸非庸則中不立是謂大道之體用相生而相助也在天下則京師為中帝王為中在一人則心為中在一草木則榦為中帝王中天下而立定四海之民建中和之極心為人身之中建立萬事酬酢

萬變榦為一草木之中則下植根本上達枝葉故一中
立而萬殊生過者不及者偏者倚者東西南北上下廉隅
皆歸極焉皆會極焉是以能無窮而不易

五常萬善或過或不及或不能平常是所謂不合乎中
庸然則孔子之時周道雖衰一時風俗民行恒性良德
未盡斷喪但失於過不及不常之差耳未若後世不孝
不悌不仁不義不忠不信全失其良心者也觀聖人嘆
辭可以見世變

子曰人皆曰予知至而莫之知避也存心養性接物處事或過或不及或不恒久已悖物忤違錯乖戾內而此心外而庶類不位不育小則起爭訟大則犯義犯刑然則不能中庸者非罾獲陷阱而何故曰致中和天地位焉萬物育焉或失或不能盡則反是遂至放辟邪侈無不為已陷罪而受刑法不可宥此司徒職天敘有典所以不得不敦也世教既衰民不興行故曰如得其情則哀矜而勿喜

道不遠人者身外無道身即道之體道即身之用也有
耳目口鼻之體便有視聽言動之用視聽言動之則視
聽言動之理既有此身便有父子兄弟夫婦長幼朋友
君臣之倫類便各有自然之理當為之職分當行之路
我身所具之理人亦具之物亦具之本不相遠人所以
去道之遠者害於有我形氣之私不忠不恕故違道日
遠已所欲者人亦欲之已所惡者人亦惡之知人與已
同忠以盡已恕以及人則近道矣下文君子之道四以

責人之心責已則盡道也

德性之自然何遠之有以其不循自然有為之之心故愈為而愈遠故曰道者自然之理不可以為遠

以人治人改而止改訓移移手中所執之柯之則於所伐之柯則能事畢矣既未能如堯舜之性之則當如湯武之身之反之人能以人之固有之善而治其不善則亦移而已矣故曰以人治人改而止

聖人以高遠自負觀此譙退之辭意深警學者舍切近

而慕高遠躡等凌節便欲升高陟遐而不知自下自邇之不可越也

無憂者其惟文王乎舜以不順於頑父嚚母不信於傲弟貴為天子富有四海而不足以解憂文王處賢父之下居賢嗣之上故無憂

思修身至不可以不知天孟子曰不得乎親不可以為人
不順乎親不可以為子人之所以為人受形於父母
受性命於天

勸賢勸親親勸大臣勸士勸百姓勸百工勸之為義非
諄諄喋喋家訓戶曉蓋使人感恩戴德奮激勉勵各盡
其職也冰炭不同處讒諂之小人天淫之美女其志在
於淫縱自恣所疾惡者有德之士投間抵隙獲明夷之
心為正人之害人君誠能斥去讒人踈遠女色不貴奇
珍異貨以德為貴則天下之士皆悅而願仕於朝矣
來百工來者日省視其勞苦月考驗其巧拙餼廩溫厚
與所作之事相稱感結人心使人人慕悅傾心竭力爭

呈效其技能是之謂來近世以來疲憊困乏而不知所省工者不賞拙者不罰凍餒其妻子不逃遁遠去則咨嗟怨望欺詐託疾矣

自誠明謂之性自明誠謂之教誠則明矣明則誠矣聖人生知安行便能實見實知實有其天德故自誠而明大賢已下不能齊聖必當推致委曲以盡其誠委曲有矯揉勉強克勝之謂也一念一言一行凡有不誠者淺則推致之深則委曲矯揉之自怨自艾自懲自創久則

亦能誠矣感悟之深力變之篤遂有形著明動變化之效聖賢同歸矣

上章天下至誠者聖人也不勉而中不思而得自然誠實降聖人一等不能性之必當擴充推致矯揉曲折凡有不誠者力反乎誠必至無一念一事之不誠固執凝定矣如自然故能發見乎外驗之行事誠不可揜顯著昭明矣中人所稟不能渾全從其性善之一偏推而致之觸類而長漸可以至於純顏子所偏者仁故由仁而

成德造道以至於聖曾子由孝而入子路由勇而入皆致曲也

尊德性而道問學天地之性人為貴夫仁天之尊爵也人人有貴於己者弗思耳矣為人而不自貴重自暴自棄自污自賤悖德賊仁不才不肖是負天地之厚我也既知我有如是之德性可不自貴自重恭敬奉持惟恐失墜乎然而當求如何行善而有得於心如何作為行事而有得於身如何可以全此心之德而不至於不仁

不智無禮無義行有不得先反求諸心後請教於父兄
師友不知者敬問之不能者博學之孔子曰我非生而
知之者好古敏以求之者也欲尊德性必先從事於問
學不問不學則不知不能雖曰尊德性亦妄自尊大妄
自貴重徒為一驕傲木偶人耳二者修德凝道之大端
致廣大心存而盡精微致知廣大配天地然必自精微細密
積日累功擴而充之推而極之而後能之故曰切問而
近思又曰守約而施博

極高明而道中庸

致知

與日月合其明求能如是必當

從事於不偏不倚無過不及恒久平常而不易其操守

言顧行行顧言然後庶幾極乎高明

敦厚

心存

以崇禮

致知

人生性質本厚因物有遷知自厚而

著力以厚然質勝文則朴野庸鄙故博學於禮文以增

崇其厚德文質彬彬然後君子

天以善與我我得之而勿失故謂之德天以善生我我
生生而不絕不悖故謂之性德性者物莫能全而人受

之是之謂良貴尊爵當自貴重故曰尊德性然人非聖不能生知必從學問而後知故當道問學人配天地而三德如天地之廣大則可溥博如天淵泉如淵天行健君子以自強不息純亦不已地勢坤君子以厚德載物法效天地日復一日推而至其極故曰致廣大廣大者精微之極故曰盡精微懸象高明無踰乎日月然其行也無過不及今歲如是千萬歲如是可不謂中歟常歟故曰極高明而道中庸故歲已去新歲復來故當溫故

以知新體立用行質完文具故當敦厚以崇禮

知天地之化育夫焉有所倚如知縣知州知府知事之
知以配天助化育為已任功用在我何有倚賴中天下
而立定四海之民正謂此也

行有餘力則以學文詩書六藝之所載亦不外是數者
但先能力行或過或不及躬行雖篤而中有未悟然後
學文以為龜鑑準繩以適其中而已不力行而先學文
徒能騰口說而已

民德歸厚矣子之於父母厚之至者不學而能者也於所厚者薄無所不薄也然則後世人君以日易月化行於上俗成於天下之人視君長何有哉

不學則心身茫然不知所立自十五志學念念不厭習熟倣效前賢之言行又十五年之久所學有諸已挺然植立而不遷徙立心有恒處身有道矣

溫故而知新

涵泳乎其所已知理義則日知其未知

既得之而時習之月

無忘其所已能未得者不可不知故日知其所無尋繹

舊聞每有新得勿謂已能而不溫一事未知心為未盡
知為未致故君子恥之故新不可不知

道者理也路也一事自有一理一事自有當行之路不
合正理不由當行之路是謂之畔然則何由而不至於
畔經事多窮理明有要約以持守則自合乎道故當博
文約禮二者廢一不可博而不守約則無綱領守約而
不博如無一錢可穿何以知道欲知父子君臣夫婦昆
弟朋友之道則博觀古人人倫嘉言善行之文而揆之

以禮則合遵而行之不至於畔

以博施濟衆言之非惟堯舜病其不足雖天地亦不能足旱乾水溢疾病灾疫山崩水涸皆是也

庸人以口體為重心性為輕蔬水苦口體富貴悅口體故樂富貴而悲貧賤苟得富貴不義不恤也得之既不義其能安且久乎心性庸得乎養其大體為大人而況聖人乎子曰飯蔬食飲水曲肱而枕之樂亦在其中矣不義而富且貴於我如浮雲顏子一簞食一瓢飲在陋

巷人不堪其憂回也不改其樂子曰賢哉回也孔顏之
所樂於此樂可見矣世之人樂富貴而悲貧賤所樂者
口體之樂耳孟子曰禮義之悅我心猶芻豢之悅我口
又曰仰不愧於天俯不忤於人二樂也又曰舜之飯糗
茹草也若將終身焉及其為天子也被紵衣鼓琴二女
果若固有之君子所性雖大行不加窮居不損焉分定
故也子思子曰素貧賤行乎貧賤故君子無入而不自
得焉口體之樂肥甘輕煖二者而已心志之樂所樂豈

有既哉濂溪每令門人尋孔顏所樂者何事以愚觀之
顏子之所樂者欲罷不能也孔子之所樂者天生德於
予也無往而不樂也豈止三事乎

游於藝游由同用藝當作義藝乃傳寫之誤以藝義音
相近故也孟子曰居仁由義大人之事備矣子曰吾不
試故藝君子多乎哉不多也藝非聖人之所貴又非可
以配乎道德仁也子曰立人之道曰仁與義道德仁義
四者不可相離故韓文公曰仁與義為定名道與德為

虛位心一身之主志入心之主用也不志於道則有是物而不知則也何以率性心無所主不知心之所以為心之理與木石何異焉惟能先明心之所以為心之理自然當行之路率性而行而得於心是之謂德理為我有脚踐實地有所憑據執守故曰志於道據於德然而仁義者又道德之實居仁由義則不悖德不畔道矣志道據德依仁游藝志道則循理得路心無邪慝據德則心有所得身有憑藉止其所矣依仁則至公無私無

非天理之流行矣游藝則即藝明理小大交相養矣
子於是日哭則不歌親戚朋友之死喪輕重厚薄固為
有間其於遭變故則一也我以親戚朋友而哭之是日
之內宜何如哉禮曰隣有喪春不相里有殯不巷歌方
哭而遽有歡心豈性情之正也哉

孔子之愛顏子愛其語之而不惰者於吾言無所不說
顏子之愛敬聖人感佩其循循善誘使人欲罷而不能
在他人則便不能然識其小而不識其大見其淺粗而

不見其精微或喜聖人之博或慕聖人之言辭文章譬
諸蒙天地生成之恩而止知其覆載受日月之照臨而
止荷其光明聖人憫其狃於見聞之得而不求其充塞
光輝自得大成之趣故曰予欲無言以感悟子貢若於
顏子不必言此子貢果不悟而發小子何述之對聖人
恐其學者以子貢之言為然學止於言語文辭而已故
直指明示而告之曰天何言哉四時行百物生非聖人
不能如此訓人惜乎子貢之終不悟也聖人之學同天

也如是故曰雨風露雷無非教也聖人動靜語默無非至訓無非可法如學者窺伺體認奚必以口舌為哉

子曰可與共學未可與適道可與適道未可與立可與立未可與權適道悟說自得也道即理也雖能悟說其理未敢必其挺然持守不背畔也故曰未可與立雖能挺然卓立多固執而不通不能隨時而取中故曰未可與權人有志於學可與之共然其智識才能不逮其志亦不能與之得路而進執德不弘信道不篤中道而畫

半途而背畔是未可與卓然立而不變就能堅定不變
又多固執而不通方故未可與權然則學道豈易能哉
孔子於齊衰冕衣裳失明之人禮貌若是惟顏子目擊
道存見微知著見聖人之心德發於威儀動作不覺失
聲而嘆曰敬而仰之則崇高宏大包天地而無外致力
研求其底裏其小無內堅確而莫能破窮其首則已在
吾之前不見其首究其尾則忽在吾之後不盡見其尾
夫子之盛德如是哉及其施教俯隨人才之小大高下

先傳示之以前言往行禮樂刑政與夫天文地理一物
一事之光華昭著者使我因外以求內因用以求體因
流以討源因末以尋本又恐我不能知萬殊之一本故
要約我以天理之自然使知不能不如是之理必至一
貫而後已聖人於我恩德懃懇如是我勉勵努力追逐
企及而恨其力之微才欲少止則味濃厚而不能舍故不
惜我之心力竭盡無餘得我意少生而後進見其卓然
峻絕而不可攀躋此顏子已至於大而求化之歟道無

不存無適非道費而隱語大天下莫能載語小天下莫能破鳶飛戾天魚躍于淵言其上下察也顏子見道如此故發此歎因言夫子善誘我先博我以文使我即物窮理而致吾之知後約我以禮使我收功守約克去己私復全天理學道至此自得居安資深欲罷而自不已盡我之力仰而視之巍巍乎無有邊際峻極于天不可以階升無由得從此顏子百尺竿頭更進一步之勇也必至於大而化聖而不可知而後已

今之琴瑟古之鄭衛此樂音之與政通也由之瑟奚為
於丘之門此氣志之形於物也故古之君子燕居養德
假物之善鳴者以宣道純粹和平之氣今之君子隨俗
進技以嫵媚哇淫之欲快耳而稱口噫其於樂以成德
也不亦遠乎

子張問士何如斯可謂之達矣至在家必達言行中節
合理不違忤於物所向皆通無有滯礙是之謂達子張
以虛譽聞通於遠近為達聖人知其情故為之問果以

聞對子曰言忠信行篤敬雖蠻貊之邦行矣言不忠信行不篤敬雖州里行乎哉

樊遲請學稼圃聖人以好禮義信答之富哉言乎上好禮使臣以禮御衆以禮以貴下賤大得民心上和下睦人非禽犢安得不以敬愛報上上好義舉措合宜小大無過舉允愜衆望安得不悅服上好信上下貴賤誠實交孚信如天地四時下安得不以情實事上四海之民敬愛如父母悅服如神明孚信如天地將見如獸走墻

如蟻慕羶如魚聚淵如鳥歸林有人此有土有土此有財倉廩府庫充實富藏天子尊居民上咸知禮義而王道大人之事備矣何必區區以百畝不易為憂哉

仕而優則學此句當在學而優則仕之後書曰學古入官政乃不迷又曰念終始典于學以此觀之學也者學為仕也故孔子以子路有民人有社稷何必讀書然後為學為佞世人要好文章不過效學前人陳言工字琢句鋪叙排布首尾腹心成章而已要優於政事不過廣覽

前人陳跡效顰而已韓子曰不得其心而逐其跡吾未見其能旭也真知言哉朱文公亦謂後人學騷譬如無疾而呻吟正謂此也

湯之於伊尹學焉而後臣之故不勞而王古之王者之於大臣有師事之禮文王之於呂尚命曰太公亦此意也下至齊桓之於管仲漢明帝之於桓榮師禮有在二君之德業方之殷周固不足言方之近世君人者求為齊桓漢明之罪人不可得也中庸之九經曰敬大臣體

羣臣也漢高帝慢而侮人猶曰吾不如子房吾不如蕭何吾不如韓信推誠嘆服字子房而不名失蕭何如左右手拜韓信以壇轂使高帝若知學又豈止此而已乎厥後賈誼以漢於功臣少恩禮正救明辨大以為非宜以武帝之強雄嚴威整冠汲黯豈非知君臣之禮之不可失也聖如陶虞以君為元首臣為股肱耳目孜孜求助如恐不及者理勢然也降及叔世君尊如天視臣如地君以郎主自處呼臣為奴婢為大臣者渙忍亡恥處

已以臺僕犬馬而不羞也嗚呼朝廷風俗之本禮樂教化之原今也至於上驕怠而自聖下頑鈍而無恥欲求夫庶事康百工熙親若同躬義若父子不亦難乎甚可畏也余讀商書見高宗之於傳說待之如砥礪舟楫霖雨麴蘖鹽梅譬如百工之於利器斯須而不可舍也親之如股肱耳目必仰以成身也敬之如師保惟恐其棄已而不言也傳說之於高宗祇若對揚告之以法天謹言慎行賞罰用人之明事事之備遠小人儉祭祀終之

以遜志敏學道積于身德修罔覺君益聖臣益恭至嗣
成湯而不祧踵伊尹而配饗不亦宜乎而又載之於書
列二典三謨湯誓湯誥之後流芳萬世永久無窮使後
世君臣取法之不暇慕君之士百讀而不能已然則聖
人定書之旨豈其微哉

萬善在我知之非艱擴充為艱能暫而不能久見近而
不能遠舉小以遺大窮明以昧幽是皆不能擴充故也
展引推托之謂擴盈滿塞實之謂充故孟子以人能充

無穿窬之心而義不可勝用人能充無欲害人之心而仁不可勝用所以不能擴充者天理才明即為人欲間斷山徑茅塞之喻豈不昭然易曉哉九層之臺一簣之積也千里之路一步之積也合抱之木毫萌之積也然則大者小之積遠者近之積幽者明之反死者生之復惡者善之悖消長對待一而二二而一故君子貴乎積學積德積行尚志尚友故孟子曰可欲之謂善有諸己之謂信充實之謂美充實而有光輝之謂大大而化之

之謂聖聖而不可知之之謂神

孟子七篇皆於人之良心發見處開導引掖若火始然而發之使明若泉始達而決之使行欲人自不能已推廣充滿以至於為堯舜深得孔子循循善誘之法若使學者苟能循序而進推救赤子入井惻隱之心事事如此而仁不可勝用矣如好色好貨好勇一出於義禮之正而不陷於人欲血氣之私存養夜氣培植朝聽晝訪之功以集義之直養浩然之氣必至於充塞天地而後

已知舜跖之分只在義利之間而已知人性之本善不染乎人欲之惡知堯舜性之之真五伯假之之偽真則公偽則私知伯夷隘柳下惠不恭折衷於孔子之時知天爵之良貴居廣居立正位行大道晉楚趙孟失其富貴知正己以正人窮則獨行達則兼善凡孟子一話一言皆與論語詩書易春秋相合互相發明如是則安有學之不進者歟

朱震泥象數盡易之變見伏互體世應至於再至於三反

覆展轉變易究竟有不能通不相符者至如乾卦六爻
周公爻辭各各分明各說一爻之義朱震取象不合揉亂
錯雜而取故混雜交互而說反與爻辭相背戾且如說
恒大象既以恒自震三變九三立而不易於爻辭初六
復曰初本泰之六四成與九出六入有陰陽相求之象
不知恒卦果自何卦而來觀震之解易因辭以求象卦
辭大象辭爻辭既不一故展轉取象而亦不一

易曰君子居其室出其言善則千里之外應之出其言

不善則千里之外違之況其邇者乎以理觀之以一氣
通之奚啻千里哉放四海際六合窮天地而準故機心
發而鷗遠至誠可以貫金石不可誣也簫韶作而鳳儀
春秋成而麟至豈不昭昭矣乎外物之來趨同氣也外
賓之來從主人之命也故曰和氣致祥乖氣致異以類
而應也

天體周匝三百六十五度四分度之一天行健日匝過
一度故三百六十日為一歲以六日之零與日月會每

二十九日過半相會又餘六日計一十二日為閏故三
歲一閏五歲則再閏以五歲總而計之是一歲三百六
十六日矣氣機周流無斯須之或息亦無斯須之不變
故無斯須之同以大率分之則為春夏秋冬溫熱涼寒
生長收藏更以大率言之則陰陽二氣耳更以大總言
之則一氣之升降往來耳進退闔闢耳細分之則晝夜
十二時百刻絪縕蒸化積而成歲故五日為一候三候
為一氣六氣為一時四時為一歲故養生者於調氣呼

吸起居寤寐一動一靜不敢過偏焉呼多吸少言語叫
笑過多則氣耗散而衰損吸多呼少則氣壅滯而不流
行動靜視聽亦然至於醫書所說五運六氣六味和平
則生人淫邪則病物是又不可不知也

一陰一陽理之自然無少偏勝氣之常也氣之反常則
為淫邪勝復或以十年一紀甲子一周大數較之終亦
均停竟不偏勝故曰其進銳者其退速甚愛必大費深
藏必厚亡氣數之不能不爾也凡民所見淺近既不觀

物又不明理見得而不見失欲速而不務久知進而不
知退故曰欲速則不達見小利則大事不成貨悖而入
者亦悖而出言悖而出者亦悖而入又曰原始反終故
知死生之說

易中何故以陽為君子陰為小人乾陽物也乾道成男
坤陰物也坤道成女此二氣之良能畫為陽夜為陰春
夏為陽秋冬為陰晝明而夜暗春夏發生長養秋冬斂
縮峭刻春夏為仁禮秋冬為義刑小人女子稟受晦暗

峭刻得陰氣多不能不爾故二氣分為五行人稟二五之精故三命家以年月日時之支干演五行之性情甲乙木多者仁丙丁火多者禮戊己土多者信庚辛金多者義壬癸水多者智亦易之義也

萬物一五行也五行一陰陽也陰陽一動靜也所謂靜者非謂氣機止息而如死灰槁木也動者升也靜者降也動者發生也靜者收斂也春夏屬陽動也秋冬屬陰靜也正如人之呼為春夏吸為秋冬吸則陽在腹內呼

則散之於外秋冬氣收斂於地中春夏氣發生於地表
孔子語常而不語怪者以為不足怪也怪者常之偏勝
反悖之氣也人能知常則萬怪變生於前而不為皇惑
皆知其有原也請於說卦通神明之德類萬物之情而
觀之既曰生生而變化無窮何所不有而仁義禮智信
五常也盡其常則義理無窮反其常則變怪亦無窮然
一一皆有其原也

乾坤三爻純陰純陽二氣不相雜外六子不過一陰二

陽一陽二陰兩端而已天地奇偶之數五十五至於揲
著則止用五十者何也蓋參天兩地而五十者天地之
正數也衍而得之者餘數也尊其正數而不敢用故用
其衍數也五十之中又尊一為太極而不用故用四十
九也

用九用六只是訓為處剛處柔也處剛則戒其无首處
柔則戒其永貞亦抑其太過而強其不足也發此例於
乾坤當於六十四卦爻中觀之然後見聖人用九六之

道

謂太極生兩儀亦可謂太極分兩儀則亦可一生二二

生四四生八一分為二二分為四四分為八以天地觀

之則生以卦畫觀之則分雖然言生不言分則不明言

分不言生則不備一分為二

一奇一偶

二分為四

太陰太陽少陰少陽

既分則為四則每爻上又生一奇一偶四分為八亦然

一分一加為十六十六為三十二三十二為六十四只

是一分一加耳此聖人畫卦得生成之自然故曰分陰

分陽迭用柔剛故易六位而成章詩書語孟之命意措詞不一體而足千變萬化觀之者當以意逆志況易乎有直陳其事直言其理者易見言在此而意在彼或比或類或嘆詠或奇或常或幽深或平易或警悟或戒勅然則聖人作意於文辭歟曰非也譬如雷霆雨露江漢河海潤澤聲響小大之不同顧所遇之地所遇之時何如耳

論卦象而不係於義理之得失不關於實用之取舍者

反對是也如朱震曰豫謙之反謙九三反而之四為豫何係於義理用舍哉以二卦論之謙何係於豫豫何係於謙哉朱震所以必從謙說者只欲就九三則互體上坤中坎坤中有水師之象耳師動而往行師也三公位反之則四四侯位有建侯之象坤伏乾天地也坎伏離日月也取象如是則與彖辭相合聖人之於易固觀象而繫辭然則必如是之牽合附會細碎曲折恐非聖人之本心也非義之正大也

大而堯舜之授受湯武之征伐九年之水七年之旱細而一政一事之得失一草一木之生死皆孰使之然哉造物也孰為造物二氣也易以道陰陽之小大無遺變化無窮可以知未來內則修身外則治天下大則贊化育得天地之心類萬物之情君子可不朝夕洗心死而後已耶

六十四卦卦辭每戒以利貞何也孝弟忠信吉德也仁義禮智恒性也當其理為正不當其理則邪枉偏陂則

反為吉德恒性之害况外物歟故聖人於每卦之下必戒之以貞貞者無毫髮之偏倚四方望之以為表極至子思則名之曰中故曰人之生也直罔之生也幸而免直其正也貞者端正無偏倚無過不及而又常永堅固久之而如是是以無所不亨無所不利也

先儒論卦變亦有太繁細而不切於實用求其所由來恐非聖人之本意亦無義理如云某卦自某卦來某卦復自某卦來難為確論一陰五陽一陽五陰二陰五陽

二陽五陰何往何變而不可必曰某卦自某卦來求之義理則無定義較之實用則無所用本之聖人畫卦之始則繁碎而無統紀又不能加八而八之變而為六十四之有原有委有綱有目整齊窮盡不亂不滯也此無他因以易變易之書偶有所見移東易西折南補北遂以為知易之變易曰變通莫大乎四時此聖人恐人妄以紛擾錯雜為變故揭此語以垂示使人觀四時之變則六十四卦之變天於四時而又繼之以通變而不

能通非知天地四時之變者也故又曰易窮則變不窮則不變此天地物理之常也所以謂窮者無他陽極而陰陰極而陽本乎一氣之聚散生消而已故又言乾以易知坤以簡能何嘗細碎紛擾朝更暮改好變之不常也

朱震以晉卦自臨來蹇之變又曰蹇六三之柔進而與君君同德故曰順布麗乎大明柔進而上行朱震卦變反復展轉止欲附會柔進上行之一言若自觀卦中來

䷗六四升於五九五降於四亦通謂自臨蹇中來於晉卦義理亦無關係謂自觀卦中來無矛盾然則卦變之說果何用哉蹇變而為臨也無義理臨反而成觀變愈多而義愈遠牽強太甚卦變之說類如此然則晉象所謂柔進而上行者何也天尊地卑乾高坤下剛上柔下此正理也坤陰上交於乾為離乾陽下交於坤為坎又晉卦六五一爻當尊位故曰柔進而上行

諸儒見卦之變或云此卦自某卦來所說雖不同以愚

觀之似皆不求其原譬如論水不討其源隨其分派既多則曰此水自某所來此水又自某所來此水復自某所來殊不知萬派總出於一流一流出於一源以諸爻彖辭觀之六十四卦之變似皆出於乾坤二卦何以言之彖辭所論卦才卦德不過乎剛柔如曰柔來而文剛分剛上而文柔又曰剛上而柔下剛中正又曰內陰而外陽內陽而外陰剛柔既交則為健動止陰說伏麗明八物之性情為萬事之吉凶

六十四卦之名固出於聖人之口然理以象著象以理實數以理定理以數顯易本於象數以聖人觀之不待言語文字則天地萬物之消長人事之進退存亡昭布森列而無一不備此邵子所謂若論先天一字無止有六十四卦而已聖人憂後人之不知不能推廣而至於變化之無窮故繫之以辭以為易之注脚故曰後天方始見功夫

蕩蕩上帝下民之辟言天之廣大覆育乃下民之君也

今人之為惡不惟不為天之弔恤反見疾惡見威怒於上帝故其命亦多邪僻而不正天命本可信今日似為不可信何則人受天命以生凡事皆有初而無終狂悖不恒不可救藥此亦詩無所歸咎而歸之於天也下七章假文王嘆紂之詞以譏厲王二章言用人之道當使賢者在位能者在職曷嘗以彊梁暴虐急斂之人在位任事莫非天降此愆慢之人以之害民歟無乃汝為君者以力助之歟三章嗟嘆殷紂曰汝執所見以為善人

者不知皆強暴之人徒增多民之怨懟使下民流言以
為對寇攘之惡用于內使下民興起詛祝無所不至而
無有窮極四章嗟紂嚴猛為能舉怨為德紂不自明其
明德賢者退而窮處故曰與讒諂面諛之人居雖有左
右前後侍御僕從之人而如無人也五章譏酒酒作狂
所從所用皆不合於義舉止既愆不分晝夜而號呼歌
舞白晝朋淫而無忌憚以晝為夜矣六章言小人乘是
肆志口口爭鳴如蜩如螗紛亂辨競如沸如羹矣大臣

小臣日趨於敗正人相尚從而行之此風內熾于中國而延及鬼方七章言既不用善人不遵先憲大命以之傾覆八章嘆其禍未及于四遠而宗國顛覆矣為殷之監豈遠哉胡不以夏桀之事觀之

威儀抑抑敬慎也如書所謂克自抑畏嚴恭寅畏者也有諸內形諸外嚴於外所以養其中也德誠於中威儀嚴慎見乎外未有心不重慎而威儀之可畏可象者也既誠於中又謹於外交相涵養以為驗故曰惟德之隅

靡哲不愚靡哲者不敢以明哲自居也不敢以明哲自居則窮理養性惟日不足故能不愚庶人之愚者其職分稟賦宜有此疾哲人而亦愚則反常矣肉食者鄙亦靡哲不愚之謂也蓋譏居高明者皆愚也亦通

無競惟人競彊也不恃其力之彊大惟務于得人

得人者得

人心得賢人衆多

故四方取以為訓有覺德行

覺德行以先覺覺後覺之意

上之人德行雖備於身又能以善及人養人使人皆覺悟遷善遠罪而不自知所謂以德服人中心悅服故四

國順之訐謨定命訐者嘆嗟論難也謨謀議也一訐一謨莫不中理定為命令發號施令告于四方使人入耳銘心而不能忘雖隔歲年之遠猶若今辰之告言猶在耳銘豈忘心之謂也譬如書之誥訓誓命使萬世之下讀之聽之尚能竦動人心況當時之人乎唐德宗奉天一詔至今猶能感人然則王言之發豈可不誠不慎哉敬慎威儀維民之則以身教者自天子至於庶人皆以修身為本也二者言而世為天下法行而世為天下則

之意也此二章既泛論在人上者不可不如是之修省
三章乃言今日之失曰興迷亂于政興者相翼相助相
尚相長之謂也政正也既昏迷紊亂不能自正又迷亂
先王之政典以至顛覆其德而不修整荒湛于酒而縱
恣沉湎汝輩惟耽樂是從不念承繼先業之重不能徧
求先王之成憲其能執守其明法歟哉者培之傾者覆
之人自喪德天亦不能加護而厭棄之故曰肆皇天弗
尚使女如泉之流下而不反無乃淪陷相與以危亡自

今已往夙興夜寐當嚴肅靖恭於朝廷之上立萬民之表章以至於修車馬備器械預戒戎兵之興作遠慮於蠻夷之遐荒五章六章復以敬身謹言為戒七章敬慎之功益密專以慎獨為戒八章言行修而人法之九章言聽之非艱行之維艱十章戒警勿以癡騃自處當以老成自警十一章言天明可畏我之所以不樂者觀爾所為夢夢然畧不省悟是以我心憂慘雖前後誨爾諄諄而聽我則藐藐忽畧不以我心為教反以我為相虐

借曰年幼不知而今亦已耄矣十二章不勝嗟嘆而言
曰告爾誨爾久矣汝若聽我用之謀議庶無大悔天運
方入于艱危將喪亡其國我之取喻夫豈遠哉昊天之
明命亦無差忒汝若回僻其德而不改使民大急于汝
夫民今而後得反之也

乾
坤

強
弱

山
澤